

Apeqquteqaat aallaavigalugu oqallinnissamut siunnersuut: Qanoq ililluta imeq sermerlu nunatta avataanut niuerutigalugu aningaasarsiutiginerusinnaavarput?

(Inatsisartunut Ilaasortaq Anthon Frederiksen, Partii Naleraq)

Akissuteqaat

(Inuussutissarsiornermut, Suliffeqarnermut, Niuernermut Nunanullu Allanut Naalakkersuisoq)

Apeqquteqaat aallaavigalugu oqallinnissamut matumunnga Inatsisartunut ilaasortaq Anthon Frederiksen Naalakkersuisunit qutsavigaarput.

Sikup erngullu avammut niuerutigineqarnissaanut inatsisitigut tunngavissanik 2001-imi Inatsisartut akuersissuteqarneranni maannalu piffissami 2016-2019-imi sikumut imermullu periusissiap nutaap suliarineqarnerani anguniagaavoq ineriartortitsinissaq, suliffissaqartitsinissaq aamma nunatta avammut niueruteqarnermi isertitaqarnissaa.

Naalakkersuisut isumaqarput sikumik imermillu suliassaqaarfiup ineriartortinneqarnera suliffinut namminersortunut niuernermik tunngaveqartumik atugassarititaasut tunngavigalugit pis-sasoq. Inuussutissarsiut nunatsinni namminersorlutik suliffiutilinnit imaluunniit nunanit allanit aningaasaliissuteqartoqarneratigut aamma kalaallit suliffiutaannik suleqateqarnikkut ineri-artortinneqassaaq siuarsarneqarlunilu.

Piffissami matumani Sermip erngullu avammut nioqqutiginnissaannut inatsit tunngavigalugu atuinissamut akuersissutit pingasut misissueqqaarnissamullu akuersissutit sisamat tunniunneqareerput. Avammut niuerutigineqarsimasut annikipput suliqaarnermilu naammassisat anertuallaaratik.

Paasinarpoq namminersorlutik aallartisarniartunik soqutiginnittoqartoq, aammali paasivarput tunisassiat nunarsuarmi niuerfinni soqutigineqalernissaat suli iluatsissimanngitsoq.

Suliniuteqartarnerni ukiuni amerlasuuni qitiutinneqarsimavoq erngup immikkut pitsaassusilitut akisuutullu tuniniarneqartarnissaa. Taamatulli niueruteqarnissamut tunisassiornermi, asartuinermi nittarsaassinermilu aningaasartuutaasartut qaffasissorujussuusut aamma paasinarsivoq.

Erngup nunarsuarmi niuerfinni iluatsittumik akikitsumik tuniniarneqartarnerani tamanut atuup-poq tunisassiornermi aningaasartuutikitsuaraasarneq, tunisassiat amerlasoorsuusarneri, soorlu aamma tunisassiat assigiinngitsut uninngasuutigineqartartorpasuit ilaattut tunisassiarpassuit nittarsaanneqartartut. Ilaannikkooriarluni imermik niueruteqartartorsuarnit, soorlu Nestlémit aamma Coca Colamit.

Naalakkersuisut 2016-imi periusissiamik nutaamik suliassaqaarfinnik taakkuninngarpiaq qitiutitsisumik saqqummiiniarput.

Periusissiami ilaatigut qitiutinneqassapput tunisassiornermi sinaakkutitsigullu atugassarititaasuni aaqquussinissaq nioqqutissiornermi akinik appasinnerulersitsisunik, eqaannerusumik assartueriaaseqarnissamik qulakkeerinissaq aammalu akitsuutinik il. il. nalimmassaaneq.

Aamma sulissutigineqarpoq sumiiffiit teknologi pisariitsoq atorlugu imermik annertuumik tuni-sassiorfiusinnaasut nassaariortornissaat, taakkulu malitsigisaannik appasinnerusumik aningaasartuuteqarfiusinnaasut qulajaaffigineqarnissaat. Periusissiamut nutaamut piareersaataasumik maannakkorpiaq misissorneqarpoq sumiiffinni arlalinni erngup pitsaassusaa, tassa sumiiffiit imermik annertuumik avammut niueruteqarsinnaanermut ilimanaatillit tassani pineqarlutik. Periusissiap aamma imarissavaa erngup nunatsinneersup qanoq nitarsaanneqartarnerata ukiuni aggersuni nukittorsarneqarnissaanut siunnersuut. Tassunga atatilugu siunertaavoq erngup pitsaassusaa aamma erngup tunisassiarineqarsinnaasup annertussusaa pillugit paasissutissartalimmik aningaasaliinissamut siumut pilersaarutit aningaasaliissuteqarsinnaasunut saqqummiunneqarnissaat.

Ukiumi aggersumi periusissiamik nutaamik Naalackersuisunit saqqummiinissarput qilanaaraarput, ullumilu tamassi oqallilluarnissarsi kissaatigalugu.